

Kommunit aqunneqarnerat pillugu Inatsisartut inatsisissaattut siunnersuut
(Nunamut Namminermut, Pinngortitamut Avatangiisinullu Naalakkersuisoq)**Saqqummiussissut****Siullermeerneqarnera**

2009-mi kommunit kattussuunnerisa ingerlanneqarneratigut kommunini aaqqissuussaanerit pingaarutilitsigut allanngortinneqarput.

Kommunit aningaasaqarniarnerisa aqunneqarnerat kommunini nutaani kommunit 18-iungallarnerininngaaniit paasiuminaannerujussuanngorsimavoq, peqatigitillugulu ilaatigut qarasaasiaqarnerup tungaatigut ineriartorneq periarfissarissaartitsinerulersimavoq sukumiinerusunik eqqornerusumillu kommunit missingersuutaannik aqutsisinnaanissamut, aamma pisariillisaanerit allat eqqarsaatigalugit. Kommuninit aamma kissaatigineqartarsimavoq kommunit aningaasaqarniarnerini aqutsinermut nutaaliaanerusunik malittarisassaqaalernissaq.

Ullumikkut kommunit tamakkiisumik ilanngaaseereerlutik ukiumut 3 milliard kroninit amerlanerusunik kaaviiartitsisarput, taamaalillutillu nunami pisortani tamarmiusumik pisuussutinik atuinerlutik annertuumik ilaallutik. Taamaattumik pisariaqarpoq kommunit pisuussutinik atuinerinik qanimut naalakkersuinikkut allaffissornikkullu nakkutilliisinaanissaq.

Taamaattumik Naalakkersuisut 2010-p upernaavani missingersuusiortarneq, naatsorsuutit, akiliisinnaassuseqarneq, kukkunersiuisarneq kiisalu karseqarneq naatsorsuuteqarnerlu pillugit nalunaarummit allanngortitsinerit aalajangiiffigisimavaat. Allanngortitsinerimi pingaartumik pineqarput immikkoortut marluk nutaat, ilaatigut kommunini akiliisinnaassuseqarneq pillugu piumasaqaat ersarissarneqarsimasoq ilaatigullu kapitali nutaaq aningaasaqarniarnermik aqutsineq pillugu. 5 %-imik akiliisinnaassuseqarnissamik piumasaqaat attatiinnarneqarpoq ilaatigullu piumasaqaammik ilallugu tassalu kommunit qaqugukkulluunniit ingerlaavartumik pisussaaffigisatik akilersinnaasassagaat.

Aamma kommunit inuussutissarsiutitigut aningaasaliisarnerat, qularnaveeqqusiisarnerat, tapiissuteqartarnerat il.il. pillugit Namminersornerullutik Oqartussat nalunaarutaat nr. 6, 7. april 2004-imeersoq atorunnaarsinneqarpoq.

Inatsisissatut siunnersuutip ilusilersorneranut atatillugu Nakkutilliisoqarfiup atuutinneqarnerata nukittorsarnissaa pillugu oqallisigineqartarsimavoq. Naalakkersuisut isumaqarput kommunerujussuit pilersinneqarnerisa kinguneranik Nakkutilliisoqarfimmi inatsisitigut piginnaasaqarnermik pilersitsisoqarnissaanik pisariaqartitsisoqartoq, matumani Nakkutilliisoqarfiup siulittaasua inatsilerinermik ilinniagaqarsimassasoq ilanngullugu, tamatumunngalu atatillugu allannguutissamik siunnersuummik saqqummiussisoqassasoq. Naalakkersuisut tamatumunnga tunngasumik partiit isumaannik tusarusupput.

Inatsisissatut siunnersuutip matuma saqqummiunneqarneratigut siunnersuutigineqarpoq kommunini aqutsinermut malittarisassat arlalitsigut iluarsiivigineqassasut kommunini aqqissuussaanerit aqunneqarnerini ukiuni kingullerpaani marlunni misilittagarisat tunngavigalugit. Iluarsinerit ilaatigut tunngaveqarput kommuninit kissaatigisamik.

Siunnersuutip tusarniaassutigineqarneranut atatillugu pitsaasumik tusarniaanermi akissuteqaataasut annertunerpaartatigut Naalakkersuisunit tusaatissatut tiguneqarput, aammalu erseqqissaatigineqaqilluni Naalakkersuisut, Kanukoka-p aamma kommunit akornanni ajunngitsumik suleqatigiinnerup pilersinneqarsimanera.

Ilimagineqarpoq ukiuni aggersuni kommunit suliassat annertuut Namminersorlutik Oqartussanit tigussagaat, taamaalilluni pisortat suliassaannik pissusissamisoortumik suliassanik agguataarinermik pilersitsisoqarluni, taamaalillunilu innuttaasunik kiffartuussineq qularnaarneqarlunilu nukittorsarneqassalluni.

Naalakkersuisut kissaatigaat inatsisissatut siunnersuutikkut taamaalilluni inatsisiliorneq ullutsinnut naleqquttunngorsarneqarsimasoq qularnaarneqassasoq.

Allanngortitsinertigut taakkunuuna Naalakkersuisunit nalilerneqarpoq kommunini malittarisassat ullutsinnut naleqquttunngorsimassasut aammalu kommunit oqartussaaffigisaani aqutsinermut atatillugu pisariaqartitanut naapertuuttunngorsimassasut.

Taamatut oqaaseqarlunga siunnersuut Inatsisartunut suliassanngortippara.